

UCAPAN YANG AMAT BERBAHAGIA
DATO SERI DATIN PADUKA
DR. SITI HASMAH BTE HJ. MOHD ALI
SEMASA MENERIMA SUMBANGAN DERMA UNTUK TABUNG
KEBAJIKAN PERSATUAN BEKAS PERAJURIT MALAYSIA
DI PUSAT DAGANGAN DUNIA PUTRA, KUALA LUMPUR
PADA HARI RABU, 11HB. FEBRUARI, 1987
PUKUL 4.30 PETANG

Dif-Dif Kehormat;

Tuan-tuan dan puan-puan sekalian.

Terlebih dahulu saya mengucapkan terima kasih kepada Persatuan Bekas Perajurit Malaysia yang telah menjemput saya berucap dan seterusnya menerima sumbangan daripada para penderma petang ini.

2. Kepada para penderma sekalian, saya ingin mengucapkan setinggi-tinggi penghargaan atas kesudian tuan-tuan dan puan-puan menyumbangkan wang ringgit untuk Tabung Kebajikan Persatuan Bekas Perajurit Malaysia. Saya difahamkan sumbangan pada hari ini berjumlah melebihi suku juta ringgit. Memikirkan keadaan ekonomi yang agak lembab sedikit pada masa ini, sumbangan tuan-tuan dan puan-puan amatlah dihargai oleh kita semua. Sumbangan sebanyak ini juga sudah

... tentu/-

tentu akan membolehkan Persatuan Bekas Perajurit meneruskan kegiatan kebajikan mereka bagi membantu balu-balu dan anak-anak para perajurit yang terkorban, serta bekas-bekas perajurit yang tercedera dan kurang upaya untuk meneruskan kehidupan seharian masing-masing.

Tuan-tuan dan puan-puan,

3. Saya yakin para dermawan serta kita semua yang hadir pada petang ini sentiasa menginsafi pengorbanan yang telah dicurahkan oleh para perajurit tanahair kita selama ini. Walau bagaimanapun elok juga kita sekali sekala menyeru masyarakat umum supaya menginsafi pengorbanan para perajurit kita itu.

... Saya/-



4. Saya yakin bekas perajurit tidak terminta-minta simpati daripada kita semua atas jasa dan pengorbanan mereka selama ini. Sebaliknya kita yang mendapat manfaat dari pengorbanan ini haruslah mengenang jasa dan bakti serta pengorbanan mereka ini. Kenangan kita ke atas jasa dan bakti mereka akan lebih bermakna dengan kesanggupan kita membela nasib anak-isteri para perajurit yang terkorban, serta membela nasib mereka yang tercedera sehingga kekurangan upaya untuk menyara hidup seperti dahulu kala. Adalah menjadi harapan kita semua semoga lebih ramai lagi para dermawan yang akan memberi sumbangan kepada Tabung Kebajikan Persatuan Bekas Perajurit ini pada masa-masa akan datang.

...Di samping/-

5. Di samping itu, pada petang yang bertuah ini marilah kita berdoa semoga anggota tentera dan polis yang sedang bertugas di kawasan-kawasan pendalaman dan di kawasan sempadan negara kita sentiasa terpelihara dari segala bahaya dan bencana. Atas kesungguhan mereka menjaga keamanan negara barulah kita dapat menjalankan tugas-tugas seharian kita dengan aman dan tenteram. Doa dan ingatan kita ini sedikit sebanyak akan menggalakkan mereka untuk bertugas dengan lebih tekad dan bersungguh-sungguh lagi.

Tuan-tuan dan puan-puan sekalian,

6. Pada hari ini juga beberapa orang bekas perajurit yang tercedera akan menerima bantuan peralatan seperti kerusi roda

...daripada/-

daripada Persatuan Bekas Perajurit Malaysia. Kita berharap dengan pemberian peralatan ini akan meyakinkan lagi tuan-tuan yang kurang bernasib baik tentang kebajikan tuan-tuan sekalian. Kita sedar peralatan ini sudah tentu tidak dapat mengembalikan kehilangan keupayaan yang ditanggung oleh tuan-tuan sekalian, tetapi kita yakin peralatan ini sedikit sebanyak akan membantu dalam menjalani kehidupan tuan-tuan.

7. Kepada Ahli-Ahli Jawatankuasa Persatuan Bekas Perajurit Malaysia, saya mengucapkan syabas di atas daya usaha dan kesungguhan tuan-tuan dan puan-puan sekalian memungut derma dan menjalankan aktiviti-aktiviti bagi

...kebajikan/-

kebajikan ahli-ahli Persatuan ini. Saya yakin usaha-usaha murni tuan-tuan dan puan-puan akan sentiasa mendapat penghargaan bukan sahaja daripada ahli-ahli tetapi juga daripada masyarakat negara ini. Kepada para dermawan pula, saya bagi pihak Persatuan Bekas Perajurit Malaysia mengucapkan setinggi-tinggi penghargaan atas kesudian tuan-tuan dan puan-puan memberi sumbangan derma ini. Harapan kami ialah lebih banyak lagi sumbangan akan diterima daripada para dermawan pada masa-masa akan datang.

Terima kasih.

